

Morning Dogri (NSD) Bulletin 20-March-2026

आकाशवाणी

खास-खास खबरां:-

1. प्रधानमंत्री नरेन्द्र मोदी होरें कतर दे अमीर अल थानी हुंदे नै गल्लबात कीती, ईद दी मुबारक दिती ते भारती समुदाय दी मदद लेई आभार प्रगट कीता।
2. बरतानिया, फ्रांस, जर्मनी, इटली, नीदरलैंड ते जापान हार्मुज जल डमरु मध्य पर सुरक्षत आओ-जाई ते ऊर्जा स्थिरता लेई किट्ठे रलियै जतन करने लेई राजी होई गे न।
3. इजरायल नै हैयफ़ा रिफाइनरी पर ईरानी हमले दी तस्दीक कीती ऐ कि एहदे नै हलका नुकसान ते बिजली सप्लाई पर असर पेया ऐ।
4. छत्तीसगढ़ असैम्बली नै धर्म दी अजादी बिल 2026 पास करी दिता ऐ- जेहदे नै जबरदस्ती धर्म परिवर्तन पर रोक लगगी सकोग।
5. महाराष्ट्र दे गढचिरोली च 68 लक्ख रपे इनामी 11 माओवादी कमांडरें आत्म-समर्पण करी दिता ऐ।
6. ते 2028 च भारत पैहली बारी विश्व इंडोर एथलेटिक्स चैम्पियनशिप दी मेजबानी करोग।



PM -Qatar Talks

प्रधानमंत्री नरेन्द्र मोदी होरें कल कतर दे अमीर शेख तमीम बिन हमद अल थानी हुंदे नै टेलीफोन पर गल्लबात कीती ते उनेंगी ईद दी बधाई ते शुभकामनां दितियां। मोदी होरें आखेआ जे भारत कतर कन्नै पूरी इक्क-मिक्कता नै खड़ोते दा ऐ ते क्षेत्र च ऊर्जा

ढांचे पर हमले दी सख्त निंदेया करदा ऐ। इक सोशल मीडिया पोस्ट च प्रधानमंत्री मोदी होरें कतर च भारतीय समुदाय दे लोकें दा ख्याल रखने, उन्दी दिक्खभाल करने ते इस ओक्खी घड़ी च उनें गी समर्थन देने लेई कतर दा आभार प्रगट कीता ते इलाके च शांति ते स्थिरता दी कामना कीती। दौनें नेताएं होर्मुज जल डमरु मध्य थमां जहाजें दे सुरक्षत ढंगै सिर निकलने पर जोर दिता।



PM -IGNC Arts

प्रधानमंत्री नरेन्द्र मोदी होरें कल नमीं दिल्ली च इंदिरा गांधी राश्ट्रीय कला केन्द्र ट्रस्टियें कन्ने मलाटी कीती ते देसै दी बन-सबन्नी संस्कृति गी होर मता लोकप्रिय बनाने पर चर्चा कीती। इक सोशल मीडिया पोस्ट पर मोदी होरें लिखेया कि इस लक्ष्य गी हासल करने दी यात्रा च होर मते लोकें गी जोड़ने, डिजिटल ते जमीनी पैहलकदमियें राएं लोकें तगर पुज्जने ते देसै दी सगगोसार विरासत दे संरक्षण ते एहदे प्रचार-प्रसार ते लोकप्रियता गी बधाने च कलाकारें ते विद्वानें गी सहायता देने पर बी चर्चा इस मलाटी दौरान कीती गई। इंदिरा गांधी राश्ट्रीय कला केन्द्र भारत सरकार दे संस्कृति मंत्रालय दे तैहत इक खुदमुख्तयार संस्थान ऐ- जेहड़ा भारतीय कला, संस्कृति ते विरासत दे संरक्षण, अनुशासन ते प्रचार प्रसार लेई कम्म करदा ऐ।



European Countries -Hormuz

बरतानिया, फ्रांस, जर्मनी, इटली, नीदरलैंड ते जापान नै होर्मुज जल डमरु मध्य च ज्हाजें दी सुरक्षत आओ-जाई लेई रलियै कम्म करने पर सैहमती जताई ऐ। इन देशें ऊर्जा बजार गी स्थिर करने लेई जरूरी गैई पुट्टने दी बी वकालत कीती ऐ। बरतानिया दे प्रधानमंत्री कीर स्टार्मर हुंदे दफ्तर आसेया जारी सांझे ब्यान च इनें देशें ईरान दे हमले दी जबरदस्त निंदेया कीती ते उसी कारवाई तुरत रोकने लेई बी आखेआ ऐ। उ'नें ईरान अग्गे अपील कीती ऐ कि ओ होर्मुज जल डमरु मध्य गी कारोबारी ज्हाजें लेई बंद करने दी धमकी देना- बरूदी सुरंगां बधाने ते ड्रोन ते मिसाइली हमलें तुरत बंद करै। ब्यान च आखेआ गेआ ऐ कि अंतराश्ट्रीय ज्हाजें दे रस्ते च रुकावट ते ऊर्जा सप्लाई च रुकावट दुनिया दी रमानदारी ते सुरक्षा लेई खतरा ऐ। तौंआई अमरीकी राश्ट्रपति डोनाल्ड ट्रम्प होरें नाटो सनें होरनें देशें अग्गे अपील कीती ऐ कि ओ होर्मुज जल डमरु मध्य गी परतियै कारोबारी ज्हाजें लेई खोलने च मदद करै।

<><><><><><>

Netanyahu- Iran

इजरायल दे प्रधानमंत्री बेन्यामिन नेतन्याहू होरें आखेआ ऐ कि इराक दे खलाफ इजरायल ते अमरीका दे फौजी अभियान पूरी दुनिया दी रक्षा लेई ऐ। कल परुशलम च उ'नें आखेआ कि इजरायली हमलें कन्नै इराक दी फौजी ताकत काफी हद्दे तगर कमजोर होई गेई ऐ ते इराक हून यूरेनियम जां बैलिस्टिक मिसाइल दा इस्तमाल नैई करी सकदा। नेतन्याहू होरें आखेआ कि इराक महत्वपूर्ण तेल रस्ते गी बंद करियै दुनिया गी परेशान करने च कामयाब नैई होग। उ'नें इब्बी साफ कीता कि इराक कन्नै साउथ पार्स गैस इलाके दे ऑपेशन गी इजरायल नै इक्कलै गे तोड़ चाड़ेया ऐ।



MEA Briefing

भारत नै खाड़ी आहले मुख्ये च ऊर्जा ठकाने पर हाल च कीते गेदे हमले गी इक चिंताजनक घटनाक्रम करार दिता ऐ। विदेश मंत्रालय दे प्रवक्ता रणधीर जायसवाल होंरे आखेआ जे इने हमले कन्ने दुनिया भरै च ऊर्जा गी लेइयै पैदा अस्थिरता दे होर गंभीर रूप लेई लेने दी शेंका बधी गई ऐ। उने आखेआ जे ऐसे हमले गी कदे स्वीकार नई कीता जाई सकदा ते इने गी तुरत रोकेया जाना लोइचदा। जायसवाल होंरे अग्गे आखेआ जे मुख्ये च LPG दी दस्तयाबी ते सप्लाई पर नेइमी तक्क रक्खी जा'रदी ऐ। उने दस्सेया जे सरकार घरेलू उपभोक्ताएं गी तरजीह देआ करदी ऐ ते ऊर्जा दे बक्ख-बक्ख जरिएं दे इस्तेमाल पर कम्म करा'रदी ऐ। जायसवाल होंरे आखेआ कि बांगलादेश, श्रीनगर ते मालद्वीज सने होरने केई गोआंडी मुख्ये बी भारत कोला ऊर्जा सहायता दी मंग कीती ऐ। उने दस्सेया जे पच्छिम एशिया मुद्दे पर भारत नै अपना रौंस साफ रखे दा ऐ। उने गलाया जे अफगानिस्तान च पाकिस्तानी ब्हाई हमले दी भारत निंदेया करदा ऐ कीजे इने हमले च गैर फौजी ढांचे गी नशाना बनाया गया ऐ-जेहदे नै आम लोकें गी नुकसान पुज्जा ऐ। उने आखेआ जे पाकिस्तान दे परमाणु प्रसार गी लेइयै पराना इतिहास रेहा ऐ ते अपनी परमाणु गतिविधियें लेई पाकिस्तान समूलची दुनिया लेई खतरा ऐ। एह गल्ल जायसवाल होंरे अमरीका दी राश्ट्रीय खुफिया निदेशक तुलसी गेवाड दे ब्यान दी पछोकड़ै च आक्खी।



Iran –Haifa Attack

राष्ट्रपति द्रौपदी मुर्मू होर अज्ज उत्तर प्रदेश दे वृंदावन च रामकृष्ण मिशन सेवाश्रम दे नंद किशोर सोमानी कैंसर चिकित्सा ब्लॉक दा उदघाटन करगंन। ओह उड़िया बाबा आश्रम ते दावानल कुंड बी जागंन। राष्ट्रपति मुर्मू वृंदावन च नीम करोली बाबा हुंदी समाधि पर पुष्पांजलि अर्पित करगंन। राष्ट्रपति होर जंदे रोज वृंदावन दे प्रेम मंदिर ते इस्कॉन मंदिर दी आरती च शामिल होइयां। इस मौके पर उत्तर प्रदेश दियां राज्यपाल आनंदीबेन पटेल बी मौजूद हियां राष्ट्रपति मुर्मू त्रंऊ दिनें दे उत्तर प्रदेश दौरै पर न।



World Indoor C'Ship

भारत 2028 च विश्व एथलेटिक्स इंडोर चैंम्पियनशिप दी मेजबानी करोग। एह आयोजन उड़ीशा दी राजधानी भुवनेश्वर दे कालिंगा स्टेडियम परिसर च कीता जाग। पोलैंड दे टोरुण च विश्व एथलेटिक्स परिशद दी बैठक च इस प्रतियोगिता दी मेजबानी दा अधिकार भारत गी दिता गेआ। भारतीय एथलेटिक्स परिशद दे प्रधान बहादुर सिंह सग्गू होरें दस्सेआ जे एह फैसला दर्शादा ऐ जे भारतीय एथलेटिक्स दी पंछान अंतर्राष्ट्रीय नक्शें पर बद्धा'रदी ऐ। तोंआई विश्व एथलेटिक्स चैंम्पियनशिप 2026 अज्जै थमां टोरुण, पोलैंड च शुरु होआ करदी ऐ।



Badminton

फ्रांस च ऑरलियन्स मास्टर्स बैडमिंटन टूर्नामेंट च तनवी शर्मा, इशारानी बरुआ ते मालविका बंसोद नै महिला एकल क्वार्टर फाईनल च प्रवेश करी लैता ऐ। प्रतियोगिता दे पुरुष युगल च अर्जुन मदाथिल रामचंद्रन ते हरिहन अमसाकरुन्न दी भारतीय जोड़ी

बी क्वार्टर फाईनल च पुज्जी गई ऐ। पुरुष एकल च आयुष शेटी राउंड ऑफ 16 दे मैच च जापान दे युदाई ओकिमोतो शा हारी गे न।



Ammish Verma- Guinness Records

भारत दे भूपतिराजु अनमिश वर्मा नै सत ज्वालामुखी चोटियें पर सब्बनें शा घट्ट समें च चढ़ाई करने दा रिकार्ड बनाइयै गिनीज़ वलर्ड रिकार्डस च अपना नां दर्ज करोआई लैता ऐ। आंध्र प्रदेश दे विशाखापत्तनम निवासी अनमिश नै इनें चोटियें पर 92 दिन, 4 घंटें ते 45 मिनट च चढ़ाई कीती। उ'नें 23 अक्टूबर 2024 गी रूस च माउंट एल्ब्रस पर चढ़ाई शुरु कीती ते 23 जनवरी 2025 गी अंटार्कटिका च सतमीं चोटी माउंट सिडली पर पुज्जे।

